

Тәуелсіздік, мәңгі тұршы қалықтап аспанымда!

Аялаймын сені, Қызылорда!



Ақмешіт

16 желтоқсан
жұма
№100 (1904)
2022 жыл

апталығы

Газет
1994 жылдың 15 сәуірінен
бастап шығады

• Қалалық қоғамдық-саяси әлеуметтік-
ақпараттық тарихи-танымдық газет •
E-mail: akmeshit.kz@mail.ru

АЗАТТЫҚТЫҢ АРАЙЛЫ ТАҢЫ: бұл мерекенің маңызы қандай?

Азаттықтың арайлы таңы. Бейбіт күннің бесігінде тербелген ұрпақ. Бұл – талайдың арманына айналған құндылықтар. Қазақ осындай жарқын күннің келуін арман еткен еді. Арманымыз ақиқатқа айналды. 1991 жылы Кеңес Одағы ыдырады. Алып империя құрамындағы одақтас республикалар өз алдына жеке мемлекет атанды. Сол жылғы 16 желтоқсанда Қазақстанның Жоғарғы Кеңесі «Тәуелсіздік» пен «Мемлекеттің егемендігі туралы» заңды қабылдады. 1991 жылдың желтоқсанынан бастап Қазақстан тәуелсіз, егемен мемлекет ретінде даму жолына түсті. Тәуелсіз Қазақстанның алдында үлкен міндеттер тұрды. Бүгінде мемлекетіміздің тұтастай даму тарихына үмілдер болсақ, азаттық, бостандық, тәуелсіздік үшін күрестің толассыз жүргізілгендігін байқаймыз. Тіпті тәуелсіздікке қол жеткізгеннен кейін де, оны сақтап қалу, болашаққа аманаттау – үлкен борыш. Қазіргі таңда еліміз әлемдік саяси аренада орны бар мемлекет ретінде қалыптасты.

4 БЕТТЕ



Қазақия

Қазақиям – азат ұям,
Қоңыр жұртым, ұлы елім.
Қаңқылдаған қаз атынан
Сөз саптаған сүлейім.

– Қанға қан! – деп,
– Жанға жан! – деп,
Атам қазақ үйреткен.
Өтті ғасыр сандаған көп
Ақ сойылын сүйреткен.

Шыңбысың сен – Хан-тәңірім,
Әлде Бетпақ – шөлмісің,
Қансыса да қан тамырың
Қыңқ етпейтін көнбісім.

Тасыдың да жуасыдың,
Түпсіз арнаң толсашы,
Дүниенің күнәсінің
Жуылатын моншасы.

Аялаған азаттығым
Бұлбұл ұшса басымнан,
Кімге керек қазақтығым
Мақтан еткен жасымнан?

Төбендегі Айды мына
Тұмарындай көремін.
Қапалы да, қайғылы да,
Қоңыр елім, өр елім.

Топырақтың табын сездім,
Жүгірдім де жығылдым.
Отан деген назым сөздің,
Мәнін сенен ұғындым.

Аспандай кең атамекен,
Иі қанбас көн дала,
Сені сүю – қате ме екен,
Сүйіп өтем сонда да!

Ұлықбек ЕСДӘУЛЕТОВ,
Қазақстан Жазушылар
одағының төрағасы

ДОДА

СЕНАТ САЙЛАУЫНА ДАЙЫНДЫҚ ҚАЛАЙ?

Ел Президенті Қасым-Жомарт Тоқаев 26 қарашада ҚР Парламенті сенатының депутаттары сайлауын тағайындау туралы Жарлыққа қол қойды. «Мемлекеттік құрылыста біз «күшті Президент – ықпалды Парламент – есеп беретін Үкімет» формуласын нақты ұстанамыз. Президент сайлауы биліктің барлық негізгі институтын дәйекті түрде жаңғырту үдерісін бастауға жол ашты. Сайлау ауқымды электронды циклдің бастапқы кезеңі болды. Біз саяси жаңғырту үдерісін жоспарлы

түрде жалғастырамыз. Бүгін мен «Қазақстан Республикасы Парламенті Сенаты депутаттарының сайлауын тағайындау туралы» Жарлыққа қол қоямын. Осылайша, жоғарғы палата депутаттарының кезекті сайлауы конституциялық реформаны нақты жүзеге асырудың жалғасы болмақ. Сайлау қорытындысы бойынша Сенаттың депутаттық корпусының бір бөлігі бәсекелестік және ашықтық қағидалары негізінде жанарды» – деді Мемлекет басшысы ұлықтау рәсімінде.

2 БЕТТЕ

СҰХБАТ



Айтжан ОРАЗБАҚОВ, тарих ғылымдарының кандидаты, доцент

«ЖЕЛТОҚСАН – ДҮНИЕЖҮЗІЛІК МАҢЫЗЫ БАР ОҚИҒА»

1986 жыл. Желтоқсан оқиғасы жұрт жадында әлі күнге жаңғырып тұр. Кеңестік жүйеге қарсы тұрған қазақ жастарының отансүйгіштік сезімі кейінгі ұрпаққа үлгі-өнеге. Сол кезде бойында ұлттық рухы аспандаған қазақтың өрмідей қыз-жігіттері алпауыт елдің айбарынан сескенбей өз елінің намысын қорғап, орталық алаңға шықты. Солардың ішінде сырбойылық бір топ жастар да болды.

Желтоқсан оқиғасы – Тәуелсіздіктің алтын тұғыры. Ата-бабалар аңсаған азаттықтың шырағы жағылған сәт. Осынау тарихи оқиғаның куәгерінің бірі – жерлесіміз, тарих ғылымдарының кандидаты, доцент Айтжан Оразбақовпен сұхбаттасудың сәті түсті.

4 БЕТТЕ

Газет оқу және стресс

Өткенде бір мұғалім әлеуметтік желіге газетке жазылу дегеннен стресске түсетінін айтып, шағымданып хат жазыпты. Ойланай қалдым. Стресске түсетіндей не жағдай болыпты? XX ғасырдың 60-шы жылдары канадалық эндокринолог дәрігерлер «стресс» атауын алғаш медицинаға енгізгенмен, осы бір жағымсыз күйден шыға алмай, күйзелетіндер де, өмірден түнілетіндер де кейінгі жылдары күрт көбейді. Психолог мамандар да жылдан-жылға жүйкесі жұқарған, ашушаң баланың да, үлкеннің де көбейіп бара жатқанын айтып жүр. Оған дәлел де керек емес. Күн сайын ел әлеуметтік желідегі електен өтпейтін ақпараттар легінен алаканындағы смартфон арқылы бар жаңалықты біліп отыр. Жаналық болғанда да «өлітіріп кетті, өртеп жіберді, секіріп кетті» деген сияқты жағымсыз ақпараттардың көптігінен-ақ бүгінде жүйкесі жұн болған жандар аз емес екенін аңғаруға болады. Қалай айтқанда да стресс жақсы емес. Мұғалімнің газетке жазылу үшін өз сөзімен айтқанда, стресске түскені... Құдай-ау, оқу дегенің өмірден түнілетіндей қорқыныш па? Оқу дегенді жан рахағы деп жүрген жоқпыз ба? Мына бір қызылды-жасыл аласапыран дүниеден сал дамылдап, бір уақыт газет-журнал ақтарып, кітап оқысаң рухани демалып, айналаға басқаша көзқараспен қарай бастаған сәтті сезінуден артық қуаныш бар ма? Кейде күйің тірлік көңіл-күйді бұзғанда бір сөз кітап оқысаң, әлемді басқаша танығандай күй кешетінін сезімді бастан кешкен боларсыз?

4 БЕТТЕ

Қызылорда облысына жұмыс сапарымен ҚР Еңбек және халықты әлеуметтік қорғау министрі Тамара Дүйсенова келді. Алдымен министр облыс әкімі Нұрлыбек Нәлібаевпен кездесіп, әлеуметтік қолдау мәселелері бойынша актив отырысын өткізді.

МАҚСАТ – ЖҰМЫССЫЗДАР САНЫН АЗАЙТУ

Аймақ басшысы Нұрлыбек Нәлібаев ел Президенті Қасым-Жомарт Кемелұлы Тоқаевтың биылғы жылғы Жолдауында әлеуметтік саланы қолдауға және дамытуға ерекше басымдық бергенін атап өтіп, аймақта халықтың тұрмыс деңгейін жақсартуға бағытталған жұмыстарды тізбектеді.

2 БЕТТЕ

БӘРІ ДЕ ТАЛАПҚА САЙ БОЛУЫ ТИІС

Сыр өңіріне
ҚР Индустрия және
инфрақұрылымдық даму вице-министрі Еркебұлан
Дауылбаев жұмыс сапарымен келді.

Вице-министр қаладағы СПМК-70 шағын ауданындағы және Сырдария өзенінің сол жағалауындағы көпқабатты несиелік тұрғын үйлердің құрылыс барысымен танысты. Сонымен қатар жаңа тұрғын үй аумақтарындағы автономды қазандық жұмысымен және тұрғын үйлерді модернизациялау жұмысын да көрді.

2 БЕТТЕ



